

M022: Frau Ava: Antichrist (V)

- 0,1 in dem jungesten zîte .
0,2 sô nâhet uns des antikristes rîche .
0,3 sô besitzet diu erde .
0,4 dâ ne sol niht ane werden .
0,5 vile michel wirdet diu nôt .
0,6 daz vihe lît allez tôt .
0,7 diu harmschare gêt über al .
0,8 des liutes wirdet ein grôz val .
0,9 sô stênt ûf algelîche .
0,10 mit gestrîte diu rîche .
0,11 nechein lant ist sô kleine .
0,12 man ne müeze iz denne teilen .
0,13 marke unde bischtuom .
0,14 grâveschefte unde herzogentuom .
0,15 daz teilet man kleine .
0,16 iz niezent zwêne oder drî vüre einen .
0,17 mit grimme unde mit sêre .
0,18 sô stêt iz dâr nâch iemer mêre .
0,19 sô hôrten wir danne
0,20 banne über banne .
0,21 wir hoeren alle stunte .
0,22 vermeinsamunge .
0,23 des wirdet daz rîche allez vol .
0,24 sô vliehent die guoten ze walde in diu steinhol .
0,25 sô ne mac iu nieman gesagen .
0,26 die nôt diu ist in den tagen .
0,27 sô hebet iuwer houbet under iuwer hende .
0,28 sô nâhet uns diu wâre urstende .
0,29 sô – sulen wir alle unseren hêrren
0,30 vile inniclîchen vlêhen .
0,31 daz wir in dem wîge .
0,32 niht verlâzen an dem êwigen lîbe .
0,33 sô sint die vile sælic .
0,34 die denne sint unbæric .
0,35 daz saget uns got hier .
0,36 dô er mit dem kriuze ze der marter gie .
0,37 swer denne niene ziuhet kint .
0,38 wie sælic die mit gote sint .

0,39 si behüetent ire kiusche unde ire magettuom .
0,40 des habent si êwiclîchen ruom .
0,41 den hât er algelîche .
0,42 gebrievet sîniu rîche .
0,43 ze den küninclîchen êren .
0,44 si sint gemahelen des des oberesten hêren .
0,45 dô ne ist niht getriuwe .
0,46 diu vrouwe der diuwe .
0,47 noch der man dem wîbe .
0,48 si lebent al mit nîde .
0,49 sô hazzet si in danne .
0,50 sam tuot der hêre den manne .
0,51 alse ist der man dem hêren .
0,52 swie guot im sî daz lêhen .
0,53 sô rîchesenet diu irricheit .
0,54 sô trûret elliu diu kristenheit .
0,55 vile michel nôt unde leit .
0,56 lîdet denne diu kristenheit .
0,57 vone sêrigen muote .
0,58 dorrent die guoten .
0,59 bedrûcket wirdet diu menige .
0,60 sô kumet uns engegene .
0,61 der von danne geboren ist .
0,62 der ist genennet antikrist .
0,63 an dem jungesten ende .
0,64 sô wirdet uns gesendet .
0,65 Elias unde Enoch .
0,66 die gewarnen doch .
0,67 êr daz zît ane gê .
0,68 daz uns der wüeterîch bestê .
0,69 vile grimmic wirdet diu nôt .
0,70 si ligent beide von ime tôt .
0,71 sô getân gestürme ist michel reht .
0,72 sô des tiuveles kneht .
0,73 mit gewalte vüre gât .
0,74 hî wie vaste er uns bestât .
0,75 mit manigen sînen listen .
0,76 die allerwirsesten .
0,77 arme unde rîche .
0,78 er müejet si alle gelîche .
0,79 er entlîbet in niht .
0,80 der guoten gestêt vile kûme iht .
0,81 sô heizet er verbieten .
0,82 unde heizet si mieten .
0,83 daz nieman geloube .
0,84 überlût noch tougen .
0,85 an der megede sune .
0,86 sancte Marien .

0,87 sô beginnet er zeichnen .
0,88 si wænent er sî gotessun .
0,89 aber diu zeichen diu er tuot .
0,90 diu ne sint nieman guot .
0,91 er ne quicket niht den tôten .
0,92 ouch ne machet er niht den stein ze brôte .
0,93 daz wazzer niht ze dem wîne .
0,94 daz verhilet er die sîne .
0,95 mit gewalte er si toubet .
0,96 unze si an in geloubent .
0,97 er rîchesenet daz ist wâr .
0,98 rehte vierdehalp jâr .
0,99 in allen den enden .
0,100 dâ got gie predigente .
0,101 vile michel wirdet sîn gewa[l]t .
0,102 sîniu wîze werdent manicvalt .
0,103 er heizet si stechen .
0,104 mit kröuwelen zebrechen .
0,105 der vile ungehiure .
0,106 der brætet si in dem viure .
0,107 vüre diu tier er si leget .
0,108 mit den besemen er si slehet .
0,109 mit hunger tuot er in vile nôt .
0,110 in diu wazzer er si senket .
0,111 ouwî wie veste si sint .
0,112 daz lîden al diu gotes kint .
0,113 sô er es denne allerminneste wænet .
0,114 der tôt im nâhet .
0,115 sîne übermuot .
0,116 vellet der tôt .
0,117 sô ne ist denne niht mêre .
0,118 newær durnehtigiu bekêrde .